

Lesona 10.

“O le Pu Lona 5, ma Lona 6”



O le Ata Tele

O le feagaiga na osia i le va o Le Atua ma Ona tagata, o le ki taua lea e malamalama gofie ai le tusi o Faaaliga. E faanaunau Le Atua e avea Ona tagata, o e manumalo ina ia latou nonofo faatasi ma Keriso i Lona nofoalii. O le iliina o pu, o le valaau lea ia suia olaga o tagata i le salamo.

E ta’u mai e pu le faamasinoga a Le Atua e faasaga ia i latou o e “nonofo i le lalolagi,” e le o iai le faamaufailoga a Le Atua.

E pei lava ona faaaogaina e Le Atua pu e lapataiina ai Ona tagata pe a latou solia le feagaiga, e faapena foi ona la faaaogaina iliga pu, e lapataiina ai i latou o sauaina pea tagata o Le Atua. E tutusa lava le auala o loo galue ai Le Atua e toe faafoi mai ai tagata i le faaolataga.

Toe Tepa i Ulua’i Pu e 4.

O nei pu uma e fitu, o le faamasinoga lea o i latou o sauaina ma fasiotia tagata o Le Atua. E malosi le fe’au ia i latou o sauaina, tuulafoaina, pe fasiotia foi ona o lo latou faatuatua. O pu nei e ta’u atu ai ia te i latou e le o moe Le Atua. o pu e ta’u atu ai, e iai lava le auala a Le Atua lava ia, e tauia ai i latou o loo agaleaga i Ona tagata. O pu nei e ta’u mai ai, ua amataina nei lea faamasinoga.

O le Faaaliga 6:9-10, i le taimi o le tatalaina o le faamaufaaailoga lona 6, o loo iai foi le ata o le tagi aue a tagata o Le Atua. O le tagi leni na faalogoina lava mai le amataga o le Ekalesia Kerisiano. E tele ina sauaina Kerisiano, e i latou e fai mai o i latou foi o Kerisiano. Ua le tau ma sui atu tagata o Le Atua, a ua tagi atu ia te Ia ia faia se fuafuaga ma se faamasinoga tonu ia i latou i latou ia ua ta’ua, ‘**o e nonofo i le lalolagi,**’ o i latou ia o sauaina tagata soo moni o Iesu.

O le tatalaina la o le faamaufaaailoga lona 6, o le **pou tu faailo** lea o le o le amataga o le iliina o pu e 7, pe o le faamasinoga foi lea a Le Atua ia i latou, ‘**o e nonofo i le lalolagi**’ (Faaaliga 9:13). O iliga pu la, o le tali lea a Le Atua i le tatalo a Ona tagata!

I le Faaaliga 8:2-5, o toeteo lava ona iliina pu, tatou te molimauina ai tagata o Le Atua o tatalo. Ona o talosaga a tagata o Le Atua, na ia

faaoo mai ai loa le faamasinoga i, '**e o nonofo i le lalolagi,**' e ala mai i le afi na sasaaina mai e le agelu o loo ia te ia le tanoa 'auro o mea manogi. E foliga mai o le tatalo a tagata o Le Atua na mafua ai ona iliina e agelu pu e 7 (Faaaliga 8:6). E iai le mana o tatalo a tagata o Le Atua. Aisea ea la e ititi ai ona tatou tatalo?

O iliga pu, o se fafagu lea ia i latou o e o teena pea Le Atua ma Ona tagata. E oo lava i le toe taimi, e iai lava le avanoa e salamo ai ma liliu atu ai i Le Atua (Faaaliga 9:20-21). E ui o le toatele o i latou e teena pea le avanoa, a e iai foi i latou e taliaina le tala lelei ma latou faafoi atu ai le viiga i Le Atua (Faaaliga 11:13; 14:6-7).

E ta'u mai ia i tatou e le Faaaliga 8:13, o auega e 3, o le faamasinoga o i latou o, '**e nonofo i le lalolagi.**' Ma e ui ina tigaina i mala ua mavae atu, a e sili atu le matautia o iliga pu e 3 o loo mulimuli mai. O iliga pu, o tulaga ia ua oo iai le lalolagi, e faasolosolo ona oo mai e mulimuli mai le tasi pu i le isi.

Faaaliga 11:13, e manino o iliga pu ma mea na tutupu mai i le faamasinoga a Le Atua ona o le tatalo a Ona tagata. Na matata'u ai nisi o, '**e nonofo i le lalolagi,**' ma latou liliu ai ma faafoi le viiga i Le Atua. O le a latou taliaina lava Iesu Keriso a o le'i tapunia le faitotoa o avanoa o le faaolataga a o le'i iliina le pu lona 7 (f15).

Faasologa O Le Iliina o Pu: O le Amataga

O le vaaiaga o le Faaaliga 8:1-2, o le vaiga lea ma le gagana o le iuga o le taulaga o Aso Faisoo i sauniga o le malumalu o le Feagaiga Tuai. A o ofoina atu e le faitaulaga le taulaga i le tamai mamoe, o le taimi lea o loo nofo faatali ma tatalo le leoa le nuu i le taimi e ulufafo mai

ai le faitaulaga ia i latou. A ulufafo mai loa le faitaulaga, ona iliina loa lea o pu e 7. O le faaaliga la lenei ua vaaia e Ioane, e mafua ona o le satauro. O lona uiga, na amata ona ilia pu i le maliu o Iesu!

O Lona I'uga

O le iliina o le pu lona 7, o le iuga lea o le faaaliga o le mea lilo a Le Atua, pe o le soo foi lea o le taliaina o le tala lelei, ona ua faia filifiliga a tagata uma (Faaaliga 10:6-7). O le molimau lava a Paulo, o le tala lelei, o le mea lilo lea a Le Atua, "**ia ou faamalosi ona tautala atu ma faailoa atu le upu o le tala lelei sa lilo**" (Efeso 6:19). O le Faaaliga 11:15, ua ilia ai le pu lona 7. Ona toe faafoi ai lea o le pule atoatoa o le malo e faavavau i Le Atua lava ia.

O lona uiga, tatou te vaai taula'i i le faataunuuina o le iliina o pu uma nei e 7 i le taimi o le Ekalesia Kerisiano—mai Kalevario i le toe Afio Faalua mai o Iesu.

E faasolosolo lelei nei mea e tutupu e pei lava ona faailoa mai e le agelu o **auega**, ona e toe 3 pu e tatau ona iliina (Faaaliga 8:13).

O Iliga Pu, O Lapataiga Ia

E taua le manatua o pu uma e 7, e faatatau uma lava i Le Atua, o Ona tagata, ma o latou fili. O lenei feteenaiga, e faatatau uma lava i le mataupu o le faaolataga. O le taua, o loo tauina i le va o Iesu ma au a Satani.

O le iliina o pu e 7, o le faamasinoga lea a Le Atua i fili o Ona tagata. O **lapataiga** mulimuli nei a o le'i oo ina liligi mai mala mulimuli e 7 (Faaaliga 15:1).

E iai lava uiga e tali tutusa ai le tulaga e oo iai pe a ilia pu, ma tulaga e oo iai pe a liligiina mai mala mulimuli e fitu. Peitai o lona eseese tele, e faatoa liligi ina mai mala mulimuli e fitu ina ua tapunia le faitotoa o avanoa i tagata uma ina ua soo le tala'i ina o le tala lelei. O loo molimau mai le Faaaliga 15:8, a tapunia loa le faitotoa o avanoa, ona le toe iai loa lea o se galuega faa-fautua i le malumalu, i le va o le toasa o Le Atua, ma i latou ua teena pea Lana faaolataga.

Tatou te vaaia i le Faaaliga 8:13, le aeto (agelu) o lele faataamilomilo ma alaga, Aue! Aue! Aue! ona o le faafanoga ua oo mai. A o agai atu i le iliina o le pu lona 5, ma lona 6, ua molimauina ai le loloto tele ma le mafiafia o le pogisa.

E Aga'i atu le Pu lona 4, i Le Pu lona 5

O le iliina o le pu lona 5, o lona uiga e le toe iai se aga'i atu le soifuaga i se lelei, a e na o le leaga, leaga lava. Peitai, a tatou muai faaalaina se taimi e malamalama atili ai i le pu lona 4, ona faigofie lea ona tatou malamalama i le pu lona 5, ma lona 6.

O le Ioane 14:29, o loo iai se fautuaga e tatau ona faatauaina pe a tatou suesueina valoaga, **“Ua Ou fai atu nei foi ia te outoua o le'i taunuu, ina ia outou talitonu mai pe a taunuu.”**

E faigofie ona tatou malamalama ma taua ia i tatou valoaga pe a oo ina taunuu.

E manino i le lauga ta'uta'ua a Iesu Lana lapataiga. O ona aso e gata ai e oo mai ai aso faigata i Ona tagata. O le upu e tatau ona tatou maitauina i le Mataio 24:4, 11, o le upu, **'fa'asese.'** Na lapataiina e Iesu Ona tagata, e ui lava o le a faateleina Keriso ma perofeta pepelo, e le tatau lava ona faaseseina ai i latou.

A e o le itu e fiafia ai, e **soo lava le talaiina le tala lelei e faavavau i le lalolagi atoa** (Mataio 24:14).

A o tatou lalata atili atu i le taimi o le iuga, o le a tatou vaaia faailoga, o Keriso ma perofeta pepelo—ma le talaiina o le Tala Lelei. I le taimi lava e tasi, e tusa ai ma tulaga tau lotu ma tapua'iga, e le a le maua ai ni manatu e sa'o atoatoa, pe sese foi atoatoa. O lotu, o le a tele lava ina fefiloa ai lelei ma leaga, aoaoga e le manino, a e tele i le nenefu.

O le aoaoga e tele lava ina eseese ai tapua'iga ma talitonuga, o le aoaoga lea i le maliu faa taulaga o Iesu Keriso. O lona uiga, na maliu Iesu mo i tatou: Na fai o Ia ma o tatou sui. Na maliu o Ia mo i tatou. O isi aoaoga uma lava, e fanaunau mai i le mea moni lenei e na o le faa-Kerisiano e maua ai. E leai se tasi tapuaiga, se'i vagana le faa-Kerisiano, e maua iai lenei aoaoga ma le mea moni. O le talitonuga lenei, e le gata ina fusia faatasi ai, a e vaevaeina ai foi. O le talitonuga lenei o le a fevaevae'i ai le au tapuai i le taimi o le iuga.

E tatau ona tatou faamanatuina pea lava pea lenei tala lelei. E tele ina galo ia i tatou lenei mea moni. O le mea lea, e ao ona tatou toe faamanatu ai:

Na manumaloina e Keriso le taua mo i tatou ina ua toe tu mai o Ia. O lenei faaolataga, o se mea alofa foaifuaina mai e pei lava o le 'ea o loo tatou manavaina (Roma 3:21-26).

O le taimi lava tatou te taliaina ai le faaolataga, o le taimi lava lea e amata ai e Le Atua Lana galuega ia i tatou. Tatou te maua le fanaufouina ma avea i tatou ma foafoaga fou a le Le Agaga Paia (2Kprinito 5:17).

A galueaina loa e Le Atua Ana vavega i o tatou olaga, tatou te iloa lelei lava. E iai i o tatou loto se molimau i lea mea moni (Roma 8:16).

E Faapefea Ona Iloa Lea Tulaga O Lo Tatou Soifuaga?

E lua tulaga o le soifuaga e mafai ona tatou iloa ai e alofa Le Atua ia i tatou ma taliaina i tatou:

- O afioga tusia a Le Atua i le Tusi Paia
- E iai le lagona loloto i totonu, o le molimau lea a le Agaga Paia i totonu ia i tatou

E iai le tusi o le Tusi Paia na tusia faapitoa e ta'u mai ai le alofa ma le taliaina o i tatou e Le Atua. Na tusia e Ioane lenei tusi atoa e ta'u mai ai o i tatou o le fanau a Le Atua. O le faaiuga o lea tusi na taofa'i ai e Ioane faapenei (**1Ioane 5:10-13**):

“O le faatuatua i le Alo o Le Atua, ua i totonu ia te ia le molimau,” (fio). Na ia toe faapea mai foi, **“Ua ou tusi atu nei mea ia te outou o e faatuatua i le suafa o le Alo o Le Atua, ina ia**

outou iloa ai ua ia te outou le ola e faavavau,” (f13). O molimau ia e lua o loo faataatia mai ai le aia tatau e taitaiina ai tapuaiga.

E galulue faatasi le Agaga Paia ma le Tusi Paia e fesoasoani ia tatou tumau ia Keriso.

E le lava le suesueina na o le Tusi Paia. A leai le fesoasoani mai a Le Agaga Paia, e le mafai ona tatou malamalama i le Tusi Paia. E le lava foi ona faalagolago i le taitaiga a le Agaga Paia e aunoa ma le suesueina o le Tusi Pa'ia. E manaomia faatasi le upu tusia, le Tusi Paia, ma le molimau i totonu, le musumusuga a le Agaga Paia, e mautinoa ai o loo tatou savavali tonu i Lona finagalo.

O le tala lelei ua faaaliga mai i Le Tusi Paia. O lona faatinoina i o tatou olaga, o fua aliali mai ia o le taitaiga a le Agaga Paia, ma lo tatou mulimuli ai i le finagalo o Le Atua.

E faaigoaina e le Faaaliga tapuaiga pepelo i le igoa, '**Papelonia.**' O lona uiga o le, '**Fenumiai.**' O le faamatalaga a le Faaaliga ia i latou o e faavaeina lenei tapuaiga faa Papeloni, o le **Tarako, o le Manu Fe'ai,** ma le **Perofeta Pepelo.** E fusia faatasi i latou nei e agaga leaga fai vavega.

O Le Lalolagi o Tapuaiga i le Taimi Nei

O upu e lua e mafai ona malamalama ai faiga tapuaiga o nei ona po:

- **Milo Faatasi (syncretism)**
- **Sootaga faa lilolilo (Mysticism)**

O le Milo Faatasi: O le mantu autu o ia ituaiga tapuaiga, o tapuaiga eseese uma e auga lava i le mea e tasi. E faapei o 'aso o se uili. E manatu e auga uma lava tapuaiga i Le Atua.

O le 'milo faatasi' o se tasi lea o faafitauli na aafia ai ekalesia e 7 i Asia na tusia iai tusi i le Faaaliga. Sa iai le lagona o nisi Kerisiano e tatau ona faaaogaina nisi o auala o tapuaiga i tupu, i totonu o tapuaiga faa Kerisiano (Faaaliga 2:14-15, 20).

E faapena foi le tulaga ua iai nei le tele o tapuaiga o nei ona po. Ua milo faatasi ituaiga tapuaiga eseese ma le mea moni.

Sootaga Faalilolilo (mysticism): O le manatu autu o lenei itua'iga o talitonuga ua faigofie ai ona galulue faatasi ma taliaina le eseese o talitonuga.

O sootaga faalilolilo, o le auala lea e malamalama ai le tagata lava ia i Le Atua. E faalagolago tele lenei talitonuga i lagona i totnu o ia lava. O le lagona o le tagata lava ia e aunoa ma le sailia o se faaaliga mai i manatu tusitusi ma mea totino, ma le faatulagaina lelei o mafuaaga.

O lenei ituaiga tapuaiga, e faatosina tele lava i ituaiga o tagata e faanaunau e maua se mafutaga loloto ma Le Atua e aunoa ma le faalagolago atu i fautuaga mai le Tusi Paia pe o suesuega foi isi.

I le ulua'i ekalesia Kerisiano, sa toatele i latou na pauu atu i tapuaiga i tupua eseese o na ona po. Na amata ona faaopoopo atu i ia tapuaiga o faiga ma talitonuga eseese faa Eleni, e aofia ai le manatu o le tino ma mea uma e vaaia maq pa'i iai, o mea leaga uma ia. O le tasi o talitonuga faa Eleni, ua na o le lagona i totonu e aoga. O le talitonuga

lava lea e tasi, o Iesu i le 'tino' sa na ona foliga mai i le tino, a e le moni lea ona o le tino e 'agasala.'

O le 'auga o lenei talitonuga e faapea, a fia mafuta le tagata i Le Atua, ona tatau lea ona tauivi ma 'a'e i le apefa'i o le malamalama i mea lilo e na o le agaga e maua ai.

Na tusi atu Paulo i le ekalesia i Kolose, ia teena ni manatu uma faapea. Na manumalo le uluai ekalesia i ia aoaoga sese na tau faaofiofi mai i totonu. Peitai, ua tatou molimauina le toe oo mai o nei ituaiga tapuaiga i lo tatou taimi. E iai i latou e manatu sa le talafeagai le auala na teena ai i latou e Kerisiano, ma o lea ua toe foi mai ai, ia latou toe maua mai aoaoga na aveesea ma i latou.

E Matua Eseese Talitonuga

O le eseese tele o talitonuga faa Porotesano ma le Katoliko, o le pulega. Tatou te suesueina ea na o le Tusi Paia tatou te iloa ai Le Atua, pe faalagolago ea le Tusi Paia i tu mai anamua?

Peitai, ua iai foi ma le tasi vaega ua faaopoopoina nei. O "faaaliga" tuusa'o mai ia, ua avea nei ma sui o le Afioga tusia a Le Atua. Ua iai nei le feteenaiga i le va o le Tusi Paia, ma "faaaliga" mai i Le Atua.

E iai nisi o manatu o le amataga lenei o le ituaiga Kerisiano fou, ua unaia e le tupu vave o le faitauaofai o tagata, ma faalapotopotoga o ekalesia.

O le a Sou Manatu i Faaupuga nei?

- E mafai ona avea se mea e mai i Le Atua, a e iai ma se mea sese

- E mafai foi ona aia se mea e le mai i Le Atua, a e iai se mea e sao ai
- Atonu e iai se mea e amata mai i Le Atua a e i'u ane ua sese
- Atonu e iai se mea e amata sese, a e i'u ane ua sa'o i Le Atua

Faamata e taunuu foi lea i tagata taitoatasi? Faamata e mafai ona auai Kerisiano faamaoni i se faalapotopotoga sese? Pe auai foi ni tagata e le ni Kerisiano faamaoni i se faalapotopotoga sa'o?

E matua taua tele lava lo tatou latalata ia Iesu Keriso ma tatou malamalama ai i le maunitoga o la tatou mafutaga ma Ia.

O le ogatotonu o le feteena'iga, o lo tatou taofi mauina lea o Iesu Keriso ma 'aia le faamamuluina o Ia tusa lava pe o le a le tulaga tatou te feagai. O lo tatou faatuatua ia te Ia, e maunitoga ai ua tatou see mai le oti i le ola. A ou faatuatua ia te Ia, o lona uiga, ua maunitoga lo'u ola e faavavau.

O Le Olaga Faa Kerisiano

E leai se faamatalaga a le Tusi Paia e faatatau i le tagata Kerisiano moni e nofonofo ma faatalitali i se vavega e tupu ai faaleagaga.

O le molimau a le Tusi Paia, o le Kerisiano ua na maua le mea alofa mai ia Iesu o le ola e faavavau, e tali atu o ia i lona faatinoina ma ola i se olaga faaleaga e faaogaina uma ai auala faapei ona faia e le tagata taalo (1Korinito 9:24-27). E le gata i lea, e agaigai pea lava i luma, a e lafoa'i mea e vaivai ai. A tatou iloa loa ua faamagaloina i tatou e Le

Atua ona o la tatou mafutaga ma Iesu, ona tatou le toe maua loa lea o se lagona tuulafoa'iina (Filipi 3:12-14).

E leai se Kerisiano faamaoni e fetafeai lona mafaufau. E faafouina pea o latou mafaufau e Le Agaga Paia.

Fai mai le 1Peteru 4:7, “. . . **ia faautauta, ma ia mataala outou ma le tatalo.**”

Ua tuuina mai le lapataiga ua lalata mai le iliina o le pu lona 5 ma lona 6.

O Le Faamalumu mai o Le Pogisa Tele

O le a faata'imua mai e le pogisa tele, o mala e sili lona matautia o le a oo mai i tagata o le lalolagi. O le aeto (agelu) faapei o se manu lele 'ai tino mate, na aumaia se fe'au o le malaia i le lalolagi (Faaaliga 8:13).

O le tasi itu o lena feteena'iga tele, tatou te vaaia ai foi le fe'au a Le Atua mo Ona tagata o loo maua i le Faaaliga 14:6-12. O le vala'au lea i tagata uma e foi e ifo i Le Atua moni. O le vala'au lea e lafoaia Papelonia, o le ua faatumulia i tu ma uiga faati'apolo. O le vala'au e lapata'i mai ai i le mataupu o le tapuai ma le ifo.

O vaega uma ia e lua e tutupu lava i le taimi e tasi: O le **Aue** mai agelu e ilia pu mulimuli e 3, ma le vala'au mai agelu e toatolu o le Faaaliga 14.

O Le Pu Lona 5 (Faaaliga 9:1-11)

O le tasi lenei vaaiaiga o le tusi o Faaaliga e sili lona matautia. Ua tuuina atu i le fetu mai le lagi le ki. O le tatalaina o le to e le gata na pouliuli ai le la ma le vanimonimo atoa. O lenei pogisa na mafua ona o se akerise, o au a Avatonu pe o Apoluonu (Faaaliga 9:3, 10-11).

E pei Lenei Vaaiga O Se Ata Tifga Tau Faafefe. O Fea e Iai Keriso i Lenei Vaaiga?

O le fetu lea na pa’u mai le lagi, o le fetu lava lea na vaaia i le pu lona 3. O le fetu lea ua faaigoaina o le agelu o le to e le gata (f1).

O le faaupuga o le, **‘to e le gata’**, (**abyss**), o le faaupuga lava lea e tasi o loo faaogaina e le tusi o Kenese, **‘soona nunumi.’** O foliga ia o le lalolagi a o le’i foafoaina ma faatulagaina lelei e Le Atua mea uma. E faapea le faamatalaga, o le **‘to e le gata,’** e leai so na iuga pe so na gataaga. O le fafa (to e le gata) lea na lafoa’iina iai agelu na tetee i Le Atua e faatali ai lo latou faasalaga.

I le Luka 8:31, sa ole atu ai agaga leaga ia Iesu, ia ‘aua le auina atu i latou i le **‘to e le gata.’** O loo molimau mai foi le 2Peteru 2:4, **“le ‘au agelu o e na agasala, a ua na tu’uina atu i latou i maea u’amea o le pogisa i seoli, ina ia taofia i latou e oo i le faamasinoga.”**

O le **‘to e le gata,’** o le nofoaga lea o le a noanoatia ai Satani i tausaga 1,000 (Faaaliga 20:1-3).

O le ata la o tatou vaaia iinei, o le ata lea o le faasaolotoina o temoni mai lo latou noanoataga. Ua tuuina atu nei i latou e fai la latou galuega o le faaleagaina o tagata.

O le ata a le Faaaliga 9:3, o temoni e pei ni se akerise, ua avea ma mala i le lalolagi. O le ata e maua foi i le tusi o Ioelu 2:1-11, na avea ai se akerise o le faasalaga o malo e iai Papelonía. Sa malaia foi Aikupito i le mala o se akerise. Sa faapena foi Isaraelu pe a latou solia aiaiga o le feagaiga ma Le Atua.

Ua Tatalaina Malosi Faa Temoni

Ua tuuina atu i nei agaga o temoni le malosi e faatama’i ai, a e le o le aia e fasitoia ai. E le ni se akerise moni ia ona e leai ni tui o se akerise i o latou i’u (Faaaliga 9:10). O loo ta’ua nei agaga o temoni e pei o akarava. O le tui a le akarava, o se tasi lea tui e sili ona tiga pe a tuia ai se tasi.

Amana’ia ma faatusatusa le vaaiga lenei ma fetalaiga a Iesu i Ona soo i le Luka 10:17-20. Na tauufatasia ai e Iesu o Satani, o akarava, o agaga leaga ma gata. O fili uma ia e le ia te i latou se mana e fasitoia ai se tagata o Le Atua.

O le pu lona 5, o le valoaga lea i le tatalaina o agaga leaga sa taofia lava se’ia oo ina ilia le pu lona 5. O le mala lenei e ala mai i agaga leaga. O le a tatou vaaia ai i lenei mala le tulaga semanu e oo iai lo tatou lalolagi pe ana le taofia i latou e Le Atua.

E ui sa tatafa mai le po uliuli i le pu lona 4, a e na matua faapogisaina lava le lalolagi ina ua saisaitia le la e le ‘asu’ o se akerise nei ua pogisa uma ai le lagi.

Ona ua mae’a ona faamaufaailogaina tagata o Le Atua (Faaal. 9:4), o le a le afaina lava i latou i lenei mala. O le faamaufaailogaina lenei o le

puiipuiga a Le Atua. E pei lava ona faia i le pu muamua, e faapena foi le faaaogaina iinei o le gagana e faaataina mai ai tagata o Le Atua, o vao iti, o laau ma mea uma lauolaola.

Manatua agelu o le Faaaliga 7:1-3, sa faatonuina e taofi i matagi pe o malosi o loo taumafai e faaleagaina le lalolagi, se'ia mae'a ona faamaufaailogaina tagata o Le Atua i o latou muaulu. O le mea moni, e matua taua tele le maua o lenei faamaufaailoga. O le a tatou manino i le Faaaliga e 13, pe o le a lenei faamaufaailoga.

E Faapei o Ona Po o Noa

O le molimau a le Faaaliga 9:5, o le a faatama'ia e nei malosi faatemoni tagata i masina e 5. O le taimi foi lea na lofia ai le lalolagi i le lolo. O le taimi atoa lea sa iai le puiipuiga faapitoa a Le Atua ia Noa ma lona aiga ina ia le afaina o i latou i le lolo.

A o lofia le lalolagi i le malosi faatemoni, o le taimi lea o le a saili ai e tagata le oti a e o le a le toe oo mai iai le oti (Faaaliga 9:6). A e pei lava ona malu Noa ma lona aiga i le vaa, e faapena foi ona malu tagata o Le Atua i ia puapuga o le iuga. E le toe iai se mea e toe afaina ai i latou.

E foliga mai (f7-10), ua matua sautua fia ata ua faaaogaina e Ioane e tau faamalamalama ai le mata'utia o le tulaga o le a oo iai le fanau a tagata i le lalolagi.

O le taualuga lenei o mea uma na tutupu i le pogisa tele i le pu lona 4. Ua faanenefuina ma oo ina mou atu ai le malamalama o Iesu i olaga o le tele o tagata o le lalolagi. A ua tatala nei e le agelu le

avanoa e pulea ai e nei malosi faatemoni mea e tutupu i tagata tetee i Le Atua.

A leai se uiga, ona leai foi lea o se faamoemoe. O le a talitonu loa i soo se mea, e iai tagata, e iai le tetee, ma nisi lava mau talitonuga. O le mea moni lava, e leai se talitonuga o nei talitonuga uma e mafai ona tetee atu i le malosi o agaga o temoni.

E le mafai foi e se talitonuga, e lafoa'ia le mafaufau fuafua lelei a e faaaogaina na o lagona, ona tula'i atu i ia temoni. O le mafaufau manino i aoaoga a le Afioga a Le Atua, o le a matua taua lava i le taimi lea.

O le Tetee a le Pogisa i Le Malamalama

E tele ata o faaaogaina i le pu lona 5, sa malamalama lelei iai le 'au faitau o le taimi o Ioane. O le pogisa, o le tuu faafeagai lea o le malamalama. I le Feagaiga Fou o aoaoga ma manatunatuga ia ua teena ai Iesu ma le tala lelei (Ioane 3:18-21).

O le 'to e le gata,' pe o le 'fafa,' o le tulaga lea o le saisaitia e Le Atua o temoni (Luka 8:30-31). O le i'u, o le faatusa lea o perofeta pepelo, "**O le perofeta ua aoao pepelo, o le i'u lea.**" (Isaia 9:15).

E ui lava e iai nisi o vaega o lenei pu e le o manino, a e manino lava le vaega e faatatau i "mala," faaleagaga o le a matua mafatia ai 'au a Satani, a e le oo ane ia i latou ua faamaufaailogaina e Le Atua (Faaaliga 9:4-6). O le a matua una'ia e lenei mala tagata e momoo atu i le oti. E afaina le Afioga a Le Atua a e le faaumatia.

Ona faasilasila mai ai lea e le Faaaliga 8:13, o le a pa’u ifo i tagata o le lalolagi **Auega e 3**. Ona oo mai ai loa lea o le pu lona 5. Tatou te faamautuina i le Faaaliga 9:12, le “*mavae ese*” atu o le ulua’i **Aue**. Ona e faapea foi le faasilasilaga i le Faaaliga 11:14, i le faai’uga o le pu lona 6, e efoliga mai ai o **Auega e 3**, (Faaaliga 8:13), o iliga pu ia o lona 5, 6 ma le 7.

Ua Mavae Atu Le Ulua’i Aue, Ua toe Lua o Loo Totoe

O Le Pu Lona 6 (Faaaliga 9:12-21)

O le fata ‘auro o mea manogi (Faaaliga 9:13), na faaali mai a o saunia e ilia pu—ua faaalii mai nei. O le ata lea o le faafogaina o tatalo a tagata o Le Atua. O lona uiga, o loo matala pea le faitotoa mo tagata latou te taliaina ai Iesu Keriso ona o loo vaaia pea le fata ‘auro.

I le ilia o le pu lona 5, sa tatou vaaia ai le mala faatemoni na oo i tagata ua mafua ai ona latou alalaga i le fia oti, a e ua le oti (Faaaliga 9:1-6). Ina ua ilia le pu lona 6, ona oti ai lea o le tasi-vae-tolu o i latou ia.

E ui i le mata’utia o le pu lona 6, a e na amataina i le leo mai nifo e 4 o le fata ‘auro mai i Le Atua. O le uiga o le ata o ‘nifo o le fata ‘auro, o le nofoaga lea o le faapalepale ma le agalelei. I le Feagaiga Tuai, e mafai e se tagata o loo manaomia le agalelei ma le faapalepale ona sulufa’i atu i le malumalu ma mau i nifo o le fata faitaulaga ma sao ai.

E le’i tapunia le faitotoa i le faaolataga. A o solovi malie atu le lalolagi i toe taimi ma lona faaumatiaga, e mafai lava ona faalogoina le si’ufofoga o Iesu ma salamo ai.

A pa’u loa le olaga i le loloto o le agasala ma le malaia, e tasi lava le auala e lavea’iina ai, o le aapa atu lea i le nofoa o le alofa tunoa o Le Atua.

O le Autau e Sosolo Mai Pei se Vaitafe

E malolosi tele faatusatusaga o le pu lona 6, ma isi vaaia o le tusi o Faaaliga. Na tatou molimauina agelu e to’a 4 o le Faaaliga 7:1-4, ma le faaupuga, “*Na ou faalogo foi i le numera . . .*” O le ‘autau foi e 200, miliona o le Faaaliga 9:16-17, e iai lona faatusatusaga ma le ffuainumera o le 144,000—o tagata o Le Atua i le taimi o le iuga.

E mafai foi ona tatou faatusatusaina le vaaiga o le sasaaina o le ipu mala lona 6 (Faaaliga 16:12-16), tatou te vaaia ai foi le Vaitafe o Eufirate, le gagana o taua, atoa ma le malosia faatemoni. O le Vaitafe o Eufirate o le Feagaiga Tuai o le vaitafe lea e tuaoi ai Tagata o Le Atua ma o latou fili. O le osofa’ia o i latou, ua faatusaina lea i lologa o le Eufirate ma lofia uma ai le malo o Iuta (Isaia 8:7-8).

O le iliina o le pu lona 6, o le faailoilo lea i ‘au a Satani e faapotopoto e tau ai le toe taua i Amaketo. O lenei ata, ua na o se faatusa o le taua faaleagaga, e le se taua faaletino. Na faalogoina e Ioane le numera e 200 miliona fitafita ti’eti’e solofanua i le Faaaliga 9:16

Ona tatalaina ai lea e agelu e 4 sa taofiofia matagi o vevesi ma mala, ma oo mai ai i le lalolagi, ma tatalaina ai foi ma agaga o temoni e fai la latou faatama’iga i le lalolagi. O le tulaga lea o le a oo iai le lalolagi, o le tulaga lava lea semanu e iai le lalolagi pe ana leai le pule a Le Atua, pe a na le afio mai Iesu ma Na faato’ilaloina le ti’apolo ma ana ‘au.

I le ata tele o le pu lona 6, na valaau ai e agelu e 4, “*au tau mai seoli,*” e lavalava i ofu mumu, lanu moana, ma le samasama. E tasi lava le auga o fuafuaga a nei agelu—ia fasiotia tagata e toatele. O a’upega malolosi latou te faaaogaina e ala mai i o latou gutu ma i’u. O ti’eti’e solofanua e 200 miliona, o le a latou fasiotia le tasi-vae-tolu o tagata soifua.

O tua atu o le nei faatama’iga, o loo ataata mai ai le agelu o le ‘fafa,’ (Faaaliga 9:11). O le lili e fasiotia tagata, e mapuna ane lava lea mai le fatu o le faamaualuga ma le tau ma sui o Satani. Ona avefa ai lea o le laloalgi atoa o le tafa o le toe taua.

Na faigata ia Ioane ona tau faamalamalamaina ‘au tau i le Faaaliga 9:17-19. A e tala tutusa lenei ata ma le ata o i le Faaaliga 16:12-16, ua au maia ai i tatou i le tua’oi ma le toe taua o le tala faasolopito o le lalolagi i Amaketo. Ua lalata atu tele lava i le tapunia o le faitoto’a o le faaolataga.

E to’atele le motu o tagata ua latou teena Iesu Keriso a e feinu ma ma onana i punavai filogia, ma latou teena ai le punavai o le ola fou. O lea ua leai ai se na te puipui ia te i latou mai ‘au a satani ua tatalaina nei.

O le Iliina o le Pu lona 7

Ua tatou faatali nei i le iliina o le pu lona 7.

Peitai, e le’i oo mai lava. Sa faataula’i le vaai i le faamasinoga a Le Atua ia i latou o ‘*e nonofo i le lalolagi.*’ A o le’i iliina le pu mulimuli, ma toe faafo’isia atu e Le Atua Lona lava malo, ua tatou maua mai le

Faaaliga 10-11, le faamalamalamaaga i le tulaga o iai soo o Iesu i lea lava taimi.

O le a tatou vaaia, ua tatalaina le tusi ititi ma ‘*aina, ma suamalie ai i le gutu a e oona i le manava.*’ O le a tatou vaaia ai foi i latou o ta’ua o Molimau e Toalua, o mafatia i la la’ua galuega. Tatou te vaaia ai foi lo latou mulimuli atu i tulaga aao o Iesu na fetalai mai, “**Afai na inosia A’u e le lalolagi, latou te inosia foi outou**” (Ioane 15:18). Peitai, e faatasi pea Le Atua ma i latou, ma tausi ia i latou.

O le Filifiliga E Tatau Ona Faia Nei

O, ‘*e nonofo i le lalolagi,*’ e i le tasi itu. A o latou vaaia nei mea uma o tutupu mai, e tumau lava le tetee o le to’atele o i latou i Le Atua.

Ua matua faigata ia i latou ona o ese mai i o latou ala ua masani ai. O a tatou filifiliga nei, o lo tatou olaga lea a taeao—*a e sili atu foi lona malolosi nai lo nei.* E le mafai ona tatou filifilia le taimi ma le tau e talafeagai ma i tatou. E iai i latou ua masani le olaga i le tetee i Le Atua, ma ua le faigofie ai ona liliu ese mai i o latou ala leaga.

Tatou te maua mai i le Faaaliga 9:20-21, pe o le a lava le mata’utia o mala o latou vaaia, e le salamo lava ma liliu atu i Le Atua. E matua mata’utia mala latou te feagai.

- E faitau miliona le ‘au faatama’oi e osofa’ia i latou (9:16)
- O le afi, le asu, le teio ma ‘autau ti’eti’e solofanua e pei ni gata ma ni akarava, o le a faatama’ia i latou.
- E tasi-vae-tolu o tagata o le lalolagi o le a fasiotia mai mala eseese

E iai le talitonuga o le a tatau loa i le vaega o totoe ona salamo ma liliu ese i ala leaga, a e leai.

E mafai ea e le tagata ona faataligatuli, ma teena pea lava pea le valaau a Le Atua, ma aulia ai e le tulaga ua leai ai se faamoemoe, ma le mafai ai e Le Atua ona lavea'iina i latou?

O le a tatou vaaia i le Faaaliga 11:13, e iai nisi o i latou o le a salamo. O le a matata'u ma vivii atu ai i Le Atua a o le'i ilia le pu lona 7 (f15)

E matua loloto le Agalelei ma le Alofa Fua o Le Atua.

E le finagalo o Ia e fano se tasi.

Faatagaina le faaliliuina e Etuati E. Erika erika@adventist.org.au
<http://carrumdowns.org> www.revelationhope.com